

NOV 08 2024

CLERK OF COURTS  
REPUBLIC OF THE MARSHALL ISLANDS

**IN THE TRADITIONAL RIGHTS COURT  
OF THE  
REPUBLIC OF THE MARSHALL ISLANDS**

<p><b>HATTIE RUSIN,</b>  <b>Riabnono,</b>  v.  <b>RITTEN JEILAR, et al.,</b>  <b>Rijumae Abnono.</b></p>	<p><b>CASE NO. 2023-00393</b> <b>HCT/LAND/MAJ</b>  <b><u>LOMNAK &amp; UWAAK EO AN COURT EO</u></b> <b><u>AN MANIT</u></b></p>
--	---

**RO UAAN PANEL EO:**

**Grace L. Leban**  
**Presiding Judge, TRC**

**Nixon David**  
**Associate Judge, TRC**

**Claire T. Loeak**  
**Associate Judge, TRC**

**JIKIN RONJAKE EO:**

**Majuro Courthouse**  
**Uliga Village, Majuro Atoll**  
**Marshall Islands**

**RAAN IN RONJAKE EO:**

**September 11 and 30, 2024**

**I. Naan in Kepellok**

Case in bwidej in ej jebar jen an Riabnono eo kajitok an jilkinlok ak komakit Rijumae Abnono rein jen Kimor Weto ilo bukun in Ajeltake, aelon in Majuro, Republic eo an Marshall Islands (“Kimor”). Riabnono eo, Hattie Rusin, ej ba bwe Rijumae Abnono rein im rej jemjen jemjati, Arbi Jeilar, Riten Jeilar, im Fred Jeilar, ekoba kora eo manedreir, Rijumae Abnono Biira Jeilar, rej jumae e ilo aer jab konan kile im kautej e einwot eo ej kabjwor maron eo an Alap im Senior Dri Jerbal ilo Kimor, im bwe ejjab bojrak aer kwalok aer jab kile ilo aer komman elon makitkit ko im rej jumae karok im plan ko an nan Kimor. Ej ba bwe Rijumae Abnono rein rekar kabojrak e jen an kommane jermal in jonjon eo nan kalikar kootaan weto ilo Kimor, im bwe ejjab

maron in likit an kojatdrikdrik ibbeir einwot jet ro im rej an bamle iumin mantin kokajriri, im ej tomak bwe enaj wor menin joran ko renaj kommani nan e ion Kimor ilju im jeklaj.

Rijumae Abnono rein, ilo juon wawein, rej ba bwe makitkit ko im rekar kommani iumin iio ko maantak rej jet wawein ko im ejelok bedbed ier iumin mantin Majol nan komakit ir jen imon jokwe im amnak eo aer im rekar bed im jokwe ie iumin elon iio ko. Rej ba bwe lollap eo jemeir, Jeilar Jolit, ear boklok im droor ir ilo Kimor, im bwe jemlok eo an Court ilo case eo *Jeilar, et al., v. Rusin, CA 1998-288* (correct citation, CA 1999-288), ear komaron ir bwe ren jokwe im amnak ilo Kimor, ejjab Hattie. Kin menin, rejjab aikuij in bok melim jen ibben Hattie nan aer komman jabrewot makitkit ko ion Kimor, im rej ba bwe makitkit ko aer rej jet wawein ko im rejimwe im ekkar iumin mantin Majol.

Padre kein ilo case in rej erra ke High Court eo emoj an erra im kabin e ke Hattie ej Alap im Senior Dri Jerbal eo an Kimor, ijowotke rejjab erra ke ewor an Hattie maron, iumin mantin Majol, nan komakit Rijumae Abnono rein jen Kimor.

## **II. Unin Iakwelel Ko & Kajitok Ko**

Emoj letok nan Court in eddo eo nan uak e kajitok kein rej laajrak ilal, ekkar nan manit im iminene ko an Rimajol:

1. Iumin mantin Majol, ewor ke jekjek im wawein ko rekkar bwe juon Alap en maron in komakit ak joloke armij ro jen bwidej eo im Alap eo ear komelim an armij rein jukjuk im amnak ie?

2. Iumin mantin Majol, elane emoj an kar Alap eo erra in lelok melim nan an armij ro rej ba bwe rej bamle ibben, jukjuk im amnak ilo bwidej eo ilo juon imon jokwe, innem ekkar ke bwe en komakit ir jen bwidej eo an bamle eo nan kajimwe ak kollaik wonan joraan ko iumin mantin Majol, elane armij ro rej ba bwe rej bamle ibben, emoj aer bar kalek ruo imon jokwe ko ilo aer jab kebaak ak bok melim jen ibben Alap eo? (*Jeilar, et al., v. Rusin, CA 98-288 (06/28/01)*).
3. Elane ejjab ekkar bwe ren komakit ir jen bwidej eo, innem ewor ke wawein ko jet im rejimwe im ekkar, nan kajimwe ak kollaik wonaan joraan ko kommani nan Alap eo, ekkar nan jekjek im wawein kein rej alikar ilo kajitok in ilon?
4. Ilo case in, elon ke ak ear wor ke wawein makitkit ko Rijumae Abnono rein rekar kommani ilo aer jukjuk im amnak ilo bwidej eo an Alap eo, im rej jet jekjek ko im remaron in komman menin aer komakit ak jilkinlok ir jen bwidej eo iumin mantin Majol?

### III. Etale Melele Ko Remool

- A. **Iumin mantin Majol, ewor ke jekjek im wawein ko rekkar bwe juon Alap en maron in komakit ak joloke armij rein jen bwidej eo im Alap eo ear komelim aer jukjuk im amnak ie? Iumin mantin Majol, elane emoj an kar Alap eo lelok melim nan an armij ro, im rej ba bwe rej bamle ibben, jukjuk im amnak ilo bwidej eo ilo juon imon jokwe, innem ekkar ke bwe en komakit ir jen bwidej eo an bamle eo nan kajimwe ak kollaik wonan joraan ko iumin Mantin Majol elane armij ro rej ba bwe rej bamle emoj aer bar kalek ruo imon jokwe ko ilo aer jab kebaak ak bok melim jen ibben Alap eo? (*Jeilar, et al., v. Rusin, CA 98-288 (06/28/01)*).**

Kemij etale un ko ak kajitok ko ruo imaan ibben dron kio. Ejelok Irojlaplap ak Irojiedrik ilo Kimor, im armij eo moktalok ilo maron, Labiliet Lokonwa, ear kokajriri ki Jeilar Jolit im Hattie Rusin. Padre kein ilo case in rej ebaake dron ilo mantin kokajriri im ewor aer jimor

kadkad nan dron itok wot jen lollap eo ear kokajriri ibbeir. Rijumae Abnono ro rej, itok wot jen kokajriri in, manedren im jibun Riabnono eo.

Hattie ej kabwijer maron ko an Alap im Senior Dri Jerbal ilo Kimor im ear kotlok an Rijumae Abnono rein bed wot im jukjuk im amnak ilo Kimor elkin wot jemlok eo an case eo moktalok. *Jeilar, et al., v. Rusin*, CA 98-288 (06/28/01).

Ekkar nan mantin Majol, maron eo nan komman jabrewot jermal ko ion bwidej ebed ibben armij ro aer bwidej eo; ak ibben Irojlaplap eo, Irojdedrik eo, ne ekkar, Alap eo, im Senior Dri Jerbal eo, ne ewor un ko rekkar iumin manit. *Article X, Section 1(2), Jemen-Ei eo an Marshall Islands*. Ilo juon bwidej eo im ejelok Irojlaplap ak Irojdedrik ie, Court in ej kile ke ebed ibben Hattie aolep maron ko ilo Kimor. Kin menin, maron eo nan droor armij ilo bwidej eo im bareinwot komakit ir jen e, elane ewor un ko rekkar iumin mantin Majol, ebed ibben Alap Hattie.

Einwot an Rijumae Abnono rein ba, ijelokin bar jet makitkit ko, emool ke rekar kabojrak an Riabnono eo kommane jermal in jonjon eo nan kalikar kotoan weto ilo Kimor, im ej bareinwot mool ke rekar jab erra in kojelaik lok e kin aer kalibwin ro nukier im kalok elonlok jen juon imon jokwe ko ilo Kimor; rej bareinwot ba bwe ewor aer maron ion Kimor einwot Hattie, einwot jet ro nejin Jeilar; im bwe wawein ko rekar kommani im makitkit ko aer rej jet wawein im jekjek ko ejelok aer bedbed nan jilkinlok ir kinke rejimwe im ekkar iumin mantin Majol.

Naan in iakwelel kein aer rej bedbed ion case eo an *Lokar v. Latak*, 6 TTR 375 (“*Lokar*”), eo im Rijumae Abnono eo, einwot Rijumae Abnono rein ilo case in, ear bok an melim jen ibben Riabnono Alap eo bwe en bed im mour ibben bamle eo an ilo bwidej eo. Court eo ilo case eo ear loe bwe ilo an Riabnono Alap eo komakit Rijumae Abnono eo im aolepen bamle eo an im mweiuk ko mweien jen bwidej eo, ear juon wawein im jekjek eo ekkar im jimwe iumin mantin

Majol. Rijumae Abnono eo ear ejelok an jimwe im maron ilo bwidej eo. Ear maron in wor an melim in kalok juon an imon jokwe im amnak ion bwidej eo einwot bar armij ro jet. Melim eo an, ekkar nan Court eo, ej juon melim eo emaron in jako ilo aer kajej tokjen ilo an ejelok un ko iumin manit. Ilo case in, Rijumae Abnono ro rej ba bwe ejelok wawein im jekjek ko rekkar nan komakit ir kinke jimwe im maron ko aer ion Kimor ejelok oktak jen jimwe im maron ko an Hattie itok wot jen kokajriri eo an lollap eo jemeir im Hattie ibben Labiliet.

Kein kajuon, kemij etale naan in iakwelel ko an Rijumae Abnono rein einwot aer ba bwe wawein im jekjek eo aer, einwot ke rej bamle im ewor aer jimwe im maron ion bwidej eo, ej juon eo einjuon im oktak, im ej kojelok case in aer jen case eo an *Lokar*. Court in ej erra ke jekjek im wawein ko ilo case eo an *Lokar* rej einjuon im oktak jen jekjek im wawein kadkad ko an Rijumae Abnono rein ilo case in. Ijowotke, kemij jab erra ke jimwe im maron ko aer ilo Kimor rej einwot im ejelok oktak jen jimwe im maron ko an Hattie. Un eo, kinke ilo case eo ear komman moktalok, Court eo ear ba bwe Jeilar ejjab maron in ajelok maron ion Kimor nan ro nejin kinke ejelok an, ak Hattie wot. *Jeilar, et al., v. Rusin*, CA 98-288 (06/28/01).

Kemij loe bwe ilo case eo an *Toring v. Lejebjeb*, 6 TTR 494, Court eo ear ba bwe jimwe im maron ko an juon [Senior] Dri Jerbal eo im ej nejin juon kokajriri rej “...*makunlok im maron jako ilo an ejelok un ko rellap im rekkar...im “un ko rekkar” nan komakit i rejjab aikuij in polel im einwot an ekka an walok ilo iminene.*” Ilo case e, ej alikarlok ke mene juon ej [Senior] Dri Jerbal ak remaron in bar komakit jen bwidej eo elane ewor un ko rekkar iumin manit.

Kemij bareinwot loe ilo case eo an *Makroro v. Benjamin*, 5 TTR 519, kin mantin jela nae im kautej dron ikotaan ro rej kabwijer maron ion bwidej ke ej nan kojbarok im drebij aenemon eo ilo bwidej eo, im bwe elane enaj wor un ko rejimwe im rekkar iumin manit eo, remaron komakit ak jolok armij eo ej maron jen ion bwidej.

Rijumae Abnono rein rej bareinwot ba bwe wawein aer makitkit, ilo aer lale im keid i ibben makitkit ko an ladrik eo nejin Rijumae Abnono eo ilo case eo an *Lokar*, ejjab einwot juon im elap aer oktak jen dron, im kin menin, Hattie ejjab maron in komakit ir jen Kimor. Court in ej kile ke jorran ko kommani nae Alap eo ilo case eo an *Lokar* rej jet jorran ko rekar jelet an wor iakwelel ko elap ainikier im jorran ko ilo enbwin, im wor manit ko rejjab ekkar ikotaan bamle; ko im kemij kile ke rej oktak jen makitkit ko an Rijumae Abnono rein ilo case in.

Ijowotke Court in ej loe ke tarlepin im tokjen aolep makitkit in jumae im kabnono ko an ladrik eo nejin Riabnono eo ilo case eo an *Lokar* rekar maron in kwalok juon wot kain jemlok im jekjek eo im ejelok oktak jen case in kio. Un eo, kinke ilo case kein jimor, makitkit ko rar bok jikin rar kwalok im kalikare an ejelok aer kea in kile im kautej e Alap eo an bwidej eo.

Ilo case eo an *Peter v. Napking, et al.*, CA 06-163 (09/16/08), Rijumae Abnono Alap eo ear konan im kajitok an komakit Riabnono Rosa Peter jen Barkan Weto kin an jab kommani bebe ko aero Senior Dri Jerbal eo im loor e plan im karok ko aer, im kin an kwalok an jab kea im jab kile maron ko aer einwot jet ro im rej kabwijer maron ko ion bwidej ilo an kar lelontak abnono eo nae ir. Court eo ear eoron naan ko an Rijumae Abnono Alap im Senior Dri Jerbal ro im ba bwe wawein im jekjek in makitkit ko an Rosa rej jet wawein ko rejjab jejjot iumin mantin Majol, botap emaron bed wot im jukjuk im amnak ilo bwidej eo elane enaj kile im kautej Alap eo im Senior Dri Jerbal eo, im bojrak jen an jumaeik ir im bebe ko aer.

Jekjek im wawein in, kemij loe, ej juon wawein eo ej kwalok ke maron eo nan komakit juon armij ak Rosa jen bwidej eo ebed ibben Alap eo im Senior Dri Jerbal eo elane ejjab bojrak jen an jab kile im jab kautej ir im jab konan loor i bebe ko an bwidej iumin manit, ak mantin bwidej. Botap jekjek im wawein eo im ej kojelok Riabnono eo ilo case eo an *Napking* jen Rijumae Abnono rein ilo case in, ej bwe Rosa, ke ej jela ke ebwod ilo tore eo rej kommane ien

ronjake eo, ear oktak jen an kolmenlokjen im an komman nan Rijumae Abnono Alap eo im Senior Dri Jerbal eo, im jolok an bwod im ba ke enaj loor karok im bebe ko jen ibbeirro jen ien eo maanlok. Einjuon im oktak jen Rijumae Abnono rein ilo case in, einwot ke Arbi Jeilar ear lukin kalikare ilo naan in kamol ko an ke e im ajri ro jatin renaj wonmanlok wot im komman jabrewot wawein ko ilo Kimor mekarta rejjab kojelaik lok ak bok melim eo an Hattie, jekdron ne Court in ak High Court eo enaj kile ke Hattie ej Alap eo.

Court in ej bareinwot loe bwe Hattie ear kommane ijo kunan nan jiban Rijumae Abnono rein elkin jemlok eo ilo case ko imaanlok, Civil Action 1999-288 Consolidated with Civil Action 1999-301. Ear lelok melim nan an Rijumae Abnono rein bed wot im jokwe ilo Kimor mekarta rekar jumae ki ikijen jimwe im maron ko an Alap im Senior Dri Jerbal. Elap ien nan aer kar jibaroke im komman oktak ko nan komanman kotaan ko aer ibben ekkar nan manit. Menin, kemij loe, bwe ej juon jekjek im wawein eo ejimwe im ekkar iumin mantin Majol ilo ad jela nae im kautej dron, einwot ke eddo eo an juon Alap ej nan lale bwidej eo im armij ro rej jukjuk im amnak ie, im lolorjake aeneman im jokane eo an armij ro rej jokwe ion bwidej eo. (Tobin, 1956 p. 12)

Kemij loe bwe Rijumae Abnono rein, rekar jab komman einwot im ukotlok ak jela nae im kollaik wonan jouj eo an Hattie im ear kommane nan ir einwot mottan eddo ko an iumin manit einwot juon Alap in Kimor, elkin wot aer kar jumae maron eo an ion bwidej ilo case ko imaanlok, im ilo jekjek im wawein aer makitkit iumin iio ko tokelik.

Hattie ear komman ijo Court eo ear ba ilo case eo an *Napking* ikijen kajitok eo an Alap eo bwe en komakit i Rosa jen bwidej eo; einwot an Court eo kar kotlok an Rosa bed wot im mour ie toon wot an naj kile im kauteje ro aer bwidej eo im loor karok im bebe ko aer. Kemij loe Hattie ear kotlok an Rijumae Abnono rein bed wot im jokwe ilo Kimor elkin wot jemlok in case ko.

EO kein karuo, Rijumae Abnono rein rej ba bwe makitkit ko aer ak jekjek im wawein ko rekar kommani rejimwe im ekkar iumin mantin Majol. Ejelok kein kamol ko rekar jakimantak ilo ien ronjake eo, ijelokin wot aer ba bwe makitkit ko aer rej einjuon im oktak jen makitkit ko an ladrik eo nejin Rijumae Abnono eo ilo case eo an *Lokar* ilo naan in kejemlok ak closing argument ko aer. Kemij etale jekjek im wawein aer makitkit ijin. Kemij loe bwe jekjek im wawein makitkit ko an Rijumae Abnono rein im rejjab emman ej koba in, ak emaron bar wor ijelokier, wawein kein rej laajrak ijin ilal:

1. ilo aer jumae maron eo an Hattie einwot juon Alap im Senior Dri Jerbal ikijen an kojerbale bwidej eo ilo aer kabnonoik lollap eo jatin, Stanley Heine, eo im ear bok an melim ibben nan an kareoik bwidej eo ilo Kimor nan an kalok juon an imon jokwe, katok juon bwol in pinana, im worwor e ijo mweo imon ej bed ie; im
2. ilo aer kalok elon imon jokwe ko im kallibun armij ro nukuier ilo Kimor ilo aer jab konanik lok Hattie ak bok melim jen ibben mokta; im
3. ilo aer ba im konono kake aer naj komman aer abnono im jumae jemlok eo an court ilo case eo mokta im ear kile ke Hattie ej Alap im Senior Dri Jerbal eo an Kimor; im
4. ilo aer jumae im bobrae Hattie jen an kommane jermal in jonjon eo nan etale kootaan weto ilo Kimor; im
5. ilo an Arbi ba bwe rejjab, im rejamin kile ke Hattie ej Alap im Senior Dri Jerbal eo an Kimor, im bwe rejjab aikuij bok melim jen ibben nan aer kommane makitkit ko ion Kimor kio ak ilju im jeklaj.

Aolep makitkit kein im rej laajrak ilon rejelet jekjek im wawein ko kommani ion bwidej, im ekkar nan mantin Majol, rej aikuij melim jen ibben aolep ro rej kabwijer maron ion bwidej.



*Article X, Section 1(2), Jemen-Ei eo an Marshall Islands.* Ne enaj itok nan Kimor, melim eo jen ibben Alap eo im Senior Dri Jerbal eo, rej aolep bed ibben Hattie.

Ilo am kar etale im keid i makitkit ko an Rijumae Abnono rein ibben makitkit ko an Stanely Heine, einwot ke rej jimor ba rej jet ro rebaake Hattie kin kotaan ko an bamle, kem ear loe bwe ilo juon wawein, Stanley Heine ear kajitok melim eo an Hattie nan an kareoik bwidej eo nan an kebooje bwe en maron in kalok juon an imon jokwe ie, im tokelik, melim nan an katoke bwidej eo kin pinana, innem worwor e torerein melan eo mweo imon ej bed ie.

Im ilo wawein eo juon, kem ear loe bwe Rijumae Abnono rein rekar jab konan bok melim jen ibben Hattie, ak kojelaiki, kin aer kalok elonlok imon jokwe ko ilo bwidej eo, ak aer kakwon ro nukuier im kalibwin ir ilo Kimor.

Court in ej loe bwe einwot jet ro im rej ba ke rej mottan bamle eo an Alap eo, Rijumae Abnono rein renkar einwot jet ro rej waan jonak nan ro jet im rej jukjuk im amnak ilo Kimor. Makitkit ko aer iumin iio ko maantak rej nan jumae im bobrae an Hattie bok jeramon einwot juon Alap im Senior Dri Jerbal, im kakure aenemon im jokane eo ilo Kimor; ejjab jet waan jonak ko remman im ekkar an ro ilo bamle eo kommani einwot jet ro im rej ebaake Alap eo.

Ilo tarlepin men kein, kemij loe bwe jekjek im wawein kein im rejelet Rijumae Abnono rein einwot jet ro rej ba bwe rej bamle im ewor kotaan ko aer ilo Kimor, rejjab jet jekjek ko im renaj koroloke ir ak kotlok bwe ren ella jen eddo ko aer nan Alap im Senior Dri Jerbal eo. Makitkit ko aer im rej laajraki ilon, kemij loe ke rej jet wawein ko im rej kalikar aer jela im melele kaki ilo aer kommani nan kwalok aer jab kile Hattie einwot aer Alap, bareinwot ilo aer jab bojrak jen aer jab kile einwot Alap eo an Kimor jen iio ko rej jemlok lok, im ilo ien ronjake case in, im ilo an walok ilo naan ko aer make, ilju im jeklaj; wawein kein rej aolep jet jekjek im wawein ko rejjab jimwe im ekkar ilo mantin Majol.

**B. Elane ejjab ekkar bwe ren komakit ir jen bwidej eo, innem ewor ke wawein ko jet im rejimwe im ekkar nan kajimwe ak kollaik wonaan joraan ko kommani nan Alap eo ekkar nan jekjek im wawein ko im rej alikar ilon?**

Einwot juon eo im ebed aolep jimwe im maron ko ion Kimor, ebed ibben Hattie maron eo nan lelok, ajelok ak komman karok ko an bwidej ilo Kimor. Maron in ej nan bareinwot droor armij ilo bwidej eo, ak ilo oktan, nan komakit ir jen bwidej eo, elane ewor wawein ko rejimwe im ekkar iumin manit. Einwot an walok ilon, eddo eo ilontata einwot juon Alap im Senior Dri Jerbal ilo Kimor, ej nan lale bwidej eo im armij ro rej mour im jokwe ie, im lolorjake aenemon im jokane eo ie.

Kemij loe ke ilo case eo an *Jekkein v. Bilimon*, 5 TTR 442, Court eo ear ba bwe “...*elane ewor likjab im jab kile nan alap eo im kolla nan e ajej in waini eo an innem menin ej watok bedbed in komakit ak joloke...jen bwidej eo jen karok an iroj eo.*” Court in ej kojenedok e case e jen case in kio einwot ke ej ba iroj eo ej eo ebed ibben maron eo nan komakit armij jen bwidej eo elane armij eo ejjab kile alap eo. Ilo case in ej bed imaan Court in kio, ejelok iroj ilo Kimor. Hattie ej make wot kin aolep maron ko ion bwidej. Im ekkar nan manit, ej e eo ebed maron in nan komakit Rijumae Abnono rein jen bwidej eo, ejjab einwot juon iroj, ak einwot juon eo im ej make kake aolep maron ko ion Kimor.

Einwot an kar Court in ba ikijejn case eo an *Napking* ilon, wawein jolok ak komakit juon jen bwidej eo ej juon ian wawein ko juon emaron kojerabale nan kajimwe ak kollaik wonan joran eo, ijelokin bwor ko jet iumin manit, itok wot jen an juon jab kile im kautej e Alap eo. Ilo case in imaan Court kio, makitkit ko im rekar bok jikier nan kojerbal bwidej eo nan ekkal im kallib rekar wonmanlok wot im komman ilo an ejelok kojela nan ak melim jen ibben Alap eo. Elane ejjab ekkar bwe ren komakit Rijumae Abnono rein nan nawawein im kajimwe ak kollaik joran kein ion bwidej, innem emaron in einwot an kar Arbi ba ilo naan in kamol ko an, ke e kab ajri

ran jatin, renaj wonmanlok wot im komman ejja jekjek im wawein ko rekar kommani mokta ilo Kimor ilo aer jab kojelaik Hattie, kin wot un in ke rejjab, im rejamin kile e ke ej Alap in Kimor.

Emoj an Hattie ba ilo naan in kamol ko an ke ejjab liki Rijumae Abnono rein im ejjab tomak ke renaj bojrak jen aer kommani joran ko ak makitkit ko rej jumae e einwot juon Alap ilo Kimor. Court in ej kile ke ilo an Hattie ba naan kein, tomak eo an ej bwe enaj ejelok an maron in bok leen jeramon ko an einwot juon eo ewor an jimwe im maron einwot juon Alap im Senior Dri Jerbal an Kimor. Enej aikuij kate kijenmej elane enaj wor wawein ko Rijumae Abnono rein renaj kommani elane renaj bed wot im mour ilo Kimor kin ejja kain kolmenlokjen im enjake kein aer nan Hattie. Court in ej kile ke wawein in ejjab emman ekkar nan manit. Kinke einwot juon Alap im Senior Dri Jerbal ilo Kimor, Rijumae Abnono rein rej aikuij, ekkar nan manit, kile im kautej e im loor karok im bebe ko an nan bwidej eo.

**C. Ilo case in, ewor ke ak ear ke wor wawein makitkit ko im Rijumae Abnono rein rekar kommani ilo aer mour im jokwe ilo bwidej eo an Alap eo im rej jet wawein ko im watok rej bedbed nan komakit ak joloke ir jen bwidej eo iumin mantin Majol?**

Einwot an Court in ba ilon, kemij loe bwe wawein makitkit ko an Rijumae Abnono rein ilo Kimor im rekar bok jikier mokta jen ien ronjake eo an case in rej jet wawein im jekjek ko, ilo tarlepier im tokjeier, rej kalikar aer jab kile im kautej Hattie einwot juon aer Alap. Ilo tore eo ej kamol, Arbi ear ba bwe renaj kommane ejja wawein im jekjek ko im rekein kommani ilo Kimor ilo aer jab jibaroklok Hattie im bok an melim, im bwe ejelok aer kolmenlokjen im konan kile e einwot Alap eo an Kimor, mekarta Court in ak High Court eo enaj kile ke ej juon Alap. Kemij loe bwe an Rijumae Abnono rein makikit im kolmenlokjen nan Alap en ejjab jimwe im ekkar nan mantin Majol, im ej bedbed in komakit ir iumin manit eo, ak jabrewot wawein kajimwe ak kollaik joran ko im High Court enaj loe ke rekkar.

Rijumae Abnono rein rej ba case eo an *Napking* ej kien jonak nan jab komakit ir jen Kimor. Ak einwot an Court in ba ilon, ejenolok im oktak Riabnono eo ilo case eo an *Napking* jen case in imaan Court kio kinke Rosa Peter, ilo an melele kake bwor eo an, ear jolok an bwor im bukot kilen im wawein an kajimwe bwor eo an kin joran ko rekar walok, itok wot jen an bwor, ibben Rijumae Abnono Alap eo im Senior Dri Jerbal eo. Court eo ilo case eo ear ba bwe ilo juon wawein, remaron kar komakit Rosa jen bwidej eo elane ear jab ak ejjab kile im kautej Alap im Senior Dri Jerbal eo ilo an loore karok im bebe ko aer ikijen mantin bwidej ilo weto eo.

Ilo case in kio, Rijumae Abnono rein elap aer melele im jela kake ta eo rej kommane ilo aer jumae Hattie mekarta jela eo aer ej bwe e eo ej kabwijer maron eo rainin an Alap im Senior Dri Jerbal ilo Kimor. Ejelok aer kolmenlokjen im konan oktak im jolok aer bwor ibben Hattie kin joran ko nan e, itok wot jen makitkit ko aer ilo tore ko remootlok, ilo ien ronjake eo an case in, im einwot aer kar ba ilo naan in kamol ko aer, ilju im jeklaj.

#### **IV. Naan in Kojjemlok**

Eddo eo ilontata an Alap eo ej ilo an kojerbale maron eo an nan drebij aenemon im jokane eo ibben armij ro im rej jukjuk im amnak ilo bwidej eo. Einwot juon eo ej Alap im Senior Dri Jerbal ilo Kimor, ewor an Hattie maron im eddo nan drebij aenemon im jokane eo ie. Maron im eddo eo nan komakit Rijumae Abnono ro jen Kimor ebareinwot bed ibben, einwot an bar bed ibben maron nan kaamnak armij ilo weto eo. Im kinke ej make wot kin maron kein ruo an bwidej ilo Kimor, jemlok ko ej kommani rej aikuij bedbed ion wawein im jekjek ko rejimwe im ekkar iumin manit, ijelokin wot ne elukin alikar jen kein kamol ko ke rejjab jimwe.

Kemij loe bwe Hattie ear maron in jake mantak kein kamol ko nan rie naan in iakwelel ko an iumin manit ikijen makitkit ko an Rijumae Abnono rein ke rej jet mantin jumae ko im ewor bedbed ier nan komakit ir jen Kimor; im bwe ejelok aer kolmenlokjen im konan bojrak kio, im

ekkar nan naan ko an Rijumae Abnono rein make, wonmanlok wot kin ejja wawein makitkit ko aer mokta im rej jumae Hattie einwot Alap eo an Kimor.

Im eo juon, Court in ej loe ke Rijumae Abnono rein rekar jab maron in jake maantak kein kamol ko nan rie im jiban iakwelel ko aer einwot jet ro im rej mottan bamle eo an kar alap eo jinoin im ej lukin an bwidej eo, ke maron ko aer ion bwidej eo ejelok oktak jen maron eo an Hattie, im bwe Hattie ejjab maron in jolok ak komakit ir kinke makitkit ko aer im rekar kommani rekkar im jimwe iumin mantin Majol.

Elkin etale file eo an case in im kein kamol ko jakimantak ilo ien ronjake eo, im kin un kein emoj kwalok ilon, ej jemlok eo an Court in bwe bedbed ion jekjek im wawein ko rejelet padre kein ilo case in, ebed ibben Hattie maron eo iumin manit nan jilkinlok ak komakit Rijumae Abnono rein, ne ej konan eo an in, kinke jekjek im wawein makitkit ko aer iumin tore ko maantak rej bedbed in komakit ir ekkar nan manit eo.

Date: 11/7, 2024.



---

Grace L. Leban  
Chief Judge, TRC



---

Nixon David  
Associate Judge, TRC



---

Claire T. Loek  
Associate Judge, TRC